

Formadornan a reuni cu Gobernador di Aruba; A prolonga encargo di formacion di gobierno

Ayera mainta formadornan Gerlien Croes y Mike Eman a reuni cu Gobernador di Aruba Su Excelencia Alfonso Boekhoudt y a entrega un tussensrapportage (relato provisional) cu informacion tocante e proceso di formacion te cu aworaki. Manera ta conoci e fecha final inicialmente stipula tabata 18 di februari, ayera, pero teniendo na cuenta cu e proceso ainda no a finalisa Gobernador di Aruba a prolonga e encargo di formacion di gobierno te dia 13 di maart.

Na salida di nan reunion cu Gobernador di Aruba ambos formador a duna nan declaracion na prensa. Lider di partido Futuro, Gerlien Croes, a splica cu nan a entrega e relato provisional y a duna gobernador un actualisacion di e desaroyonan di ultimo dia- y simannan, y principalmente ariba locual ya nan a bin ta reconoce den e rondanan di consulta cu nan ta hibando.

E tussentijdsrapportage aki ta consisti di tur loke e formadornan a haci te aworaki cuminsando na crea e base di confiansa entre e dos partido, e proceso pa yega na un programa di gobernacion, e consultanan, e proceso interno di e dos partido pa yega na reparticion di e portfolio y e proceso pa yega na candidatonan pa minister, entre otro.

Croes a indica cu e proceso di formacion ta consisti di diferente fase y aworaki lo cuminsa pasa pa e fase di proposicionnan di posibel candidato pa minister. El a informa cu nan a ricibi indicacion cu proceso di screening a base di locual ley ta stipula ta bay dura mas di loke nan a calcula.

El a splica cu e proceso cu ta delinea pa ley, manera cu e ley a ser aproba na 2021, ta cuminsa cana aworaki, y hunto cu esaki tin diferente fase pareu ta cana tambe. El a indica cu nan ta bay continua cu e consultanan den e dianan binidero y a menciona cu tambe ta den preparacion e documento oficial di un acuerdo di gobernacion. El a agrega cu banda di esey a cuminsa cana e proceso di e posibel candidatonan pa minister y ta spera cu pa dia 13 di



maart lo finalisa e ronda.

Croes a indica cu durante e reunion cu Gobernador a papia mas detaya di loke ta e reparticion di e dominionan di e ministerionan, pero no a menciona ainda ken ta e candidatonan pa minister ni ki ministerio nan lo mancha.

Pa loke ta partido Futuro y posibel carteranan cu e partido lo maneho, Croes a indica cu den liña grandi ta cu ministerionan di Finanzas y Economia, Relacionnan di Reino y Educacion, ta algun di e topiconan cu Futuro lo tin.

Contestando pregunta di prensa si tabata cardinal pa partido Futuro haya e carteranan di Finanzas, Croes a splica cu tur area na e momento aki ta cardinal y ta importante pa e gabinete ta solido y cu por conta riba otro. "Locual nos tin cu sa ta cu, cualkier sea na final di dia e reparticion, nos tin cu bay complementa otro, mester apoyo otro pasobra ta bay tin hopi area cu ta bay crusa otro y si no ta bay tin e cooperacion debido den e gabinete entre e ministernan, e no ta bay facilita e proceso," el a bisa.

Di su banda Mike Eman,

contestando e pregunta si tabata dificil pa AVP e cartera di Finanzas na Futuro, a splica cu un poco si, pero esaki no ta pa falta di confiansa den partido Futuro.

El a sigui splica cu e hecho ta cu partido AVP durante di eleccion a pone un enfasis hopi grandi riba mira tur caminda den e presupuesto unda por aloca fondonan pa bay yuda esnan cu a keda atras e ultimo añanan. El a referi na pensionadonan, esnan di salario minimo, y aumento reparatietoeslag.

"Nos lo kier haci e trabou ey cu hopi creatividad y intensidad, semper kedando naturalmente den e margen- y normanan cu ta presupuesta. Pero den dialogo cu Futuro, y cu mas hende den Futuro, nos a haya e confiansa cu e mesun fervor cu nos tin pa haci e ehercicio ey pa haya e fondo necesario pa yuda esnan di menos recurso den nos pais, nos por confia cu e minister cu Futuro lo apunta lo hacie cu e mesun fervor cu uno di AVP y nos tin e confiansa cu esey lo sucede," Eman a sigura.

Pa loke ta e fecha final di 13 di maart, el a indica cu door cu nan a haya mas tempo, nan



por sigui haci e consultanan cu e resto di gremionan den comunidad ampliando tur e informacion cu nan ta ricibiendo, cual el a remarca ta hopi importante na momento di goberna e pais.

Pa loke ta trata e cartera di Relacionnan di Reino, teniendo na cuenta cu dia 1 di mei ta e fecha final pa yega na un acuerdo cu Hulanda riba e Rijkswet, a puntra lider di partido Futuro con e ta sinti cu awor e proceso di formacion ta bayendo te den luna di maart.

El a splica cu e topico aki uno cu ta regarda e gabinete completo y ta loke aworaki tin poni riba agenda hopi halto. El a indica cu ora ta papia di un Rijkswet esaki no ta descarta full e gabinete awor cu tin cu bay den negociacion, y cu e contacto cu Hulanda tin cu continua.

Croes a bisa cu nan tambe ta sinti e pura y tin algun desaroyo cu e proceso di Rijkswet. El a referi na e rapport cu mester keda cla di IMF. El a indica cu e rapport aki tur hende ta sperando, no solamente Aruba pero Hulanda tambe, pero el a dura mas tempo di loke a spera y esey ta aplasa e proceso completo

di loke ta tratamiento di e Rijkswet.

"Nos ta pendiente tanto di loke ta e rapport aki pero tambe na mesun momento teniendo tur e consultanan cu nos ta teniendo y den plan y ideanan ya caba ta bezig cu algun voorwerk. Internamente los di como formador, tin gruponan di trabou di partido cu na e momentonan aki ya ta haciendo huiswerk cu pa ora e momento yega bo ta full prepara caba pa loke ta e proposicionnan cu bo tin y pa continua bon argumenta y bon documenta cu e negociacionnan cu bo kier hiba cu Hulanda," el a bisa.

